



泡麵

還香啦！三十年來毋識買泡麵吔！今年七月半特別買來普渡好兄弟，到這下過忒歸半年咧！還官打開半包來食。暗晡夜恁寒个天時，開一包來泡啊！無會壞忒！莫打爽！

泡麵正出个時節，記得安到「生力麵」，當多人一買啊著毋使泡，就拿來生食，食到暢蹠蹠仔。後來，各種牌仔、味緒、樣式个泡麵，雞湯麵、排骨麵、燥麵、牛肉麵、滿漢全席，像水瀉樣仔走走出來，想愛食麵就毋使煮哩噲！齋个、葷个、辣个，各式各樣，項項齊全，看到眼茫鼻花，當錫人食，毋知愛買哪種正好？

細人還細个時節，成下仔買泡麵轉來，滾水正冲啊落，逐個就頭望望仔等食。蓋仔正揜無幾久，輒常等毋掣，就偷偷仔走去同蓋仔打開來看好食官？鼻著實在還香哪！口涎水強強就跌下來，想愛夾一兩截仔來食，無提無防舖娘姐喊一聲：「等莫浸加一下仔！」遽遽同到嘴个麵呢倒轉去。

記得三十空年前，正搬到這位所个時節，兩公婆堵好同時換新頭路，細人仔轉學換新學校，新住所、新頭路、新學校，一切就新个當毋慣。七早八早愛赴上班，走到兩腳無搭地，盡冤枉个係到拜三，三個細人仔毋使讀下晝頭，就愛抽間轉來搵晝界食，逐擺就泡麵，正開始逐個就暢到奈毋得，有泡麵好食，食忒還愛尋食，慢慢仔就驚哩噲！膩眩吔！一學期過後，全部就餵著咧！從該過後一看著泡麵就驚，莫怪七月普渡好兄弟个泡麵，到這下還歸包仔好好，無人愛去開封。

在高中教書个時節，有一個英文先生同佢講：佢有一個學生仔在台北讀大學讀到四年生，有一日打電話分佢講定著愛見先生一面，去到正知發大腸癌住院。講差毋多日日食泡麵，吩咐先生定著愛同學生仔講毋好長透食。恁香、恁好食个泡麵裡背，因等乾燥劑、防腐劑、香劑、重鹽分這兜對身體有害个物質，毋過當多人還係分佢錫著，食到超過。

時到這下，雖然三十年來同佢無麼个交情，毋知佢會去買泡麵拜好兄弟，講係順應時勢，怕係想豺一下！撿兜仔味道定定！

作者：徐貴榮

☆詞彙學習☆

- 【好兄弟】ho`hiung`ti：本指感情很好的兄弟，【浸】jim：浸泡。
 此指「孤魂野鬼」。
 【暢蹠蹠仔】tiong`dia`dia`e`：高興的樣子。
 【抽間】cu`gien`：抽空，亦說成「抽牽」。
 【眼茫鼻花】ngien`mong`pi`fa`：本指「頭昏眼花、目不暇給」，引伸為「眼花繚亂」。
 【膩眩】ne`goi`：因油膩而生的反胃感
 【揜】giem`：蓋
 【餵】teu：因吃膩而不敢吃。
 【錫】xiang`：吸引。
 【豺】sai`：嘴饞。

☆文法學習☆

【等莫...】den`mog：說法等於「仰毋（分佢）...？」。「等莫+V+加一下」，表示「怎不再V一下？」

例1：該芥菜正曬無幾久，等莫晒加一下仔？（那芥菜才曬不久，怎不讓它再曬一下？）

例2：雨正停，等莫朗加一下仔正轉去。（雨才停，怎不等雨過天青一下才回家？）